

**A C T A 14/2019**  
**SESIÓN EXTRAORDINARIA PLENO MUNICIPAL**  
**– 9 DE OCTUBRE DE 2019 –**

Na Casa do Concello, a nove de outubro de dous mil dezanove, reúnen-se en primeira convocatoria os/as señores/as concelleiros/as que se relacionan a continuación, baixo a presidencia do sr. alcalde, D. Rafael C. Sisto Edreira, co obxecto de celebrar a sesión extraordinaria correspondente ao día da data, para a que foron debidamente convocados/as.

**ASISTENTES:**

**Alcalde:**

D. Rafael Carlos Sisto Edreira

**Concelleiros/as:**

D.<sup>a</sup> Iria Otero Romero

D. Xosé Ignacio Iglesias Villar

D.<sup>a</sup> María López Álvarez

D. José Manuel Guerra Calvelo

D. Antonio Reyes Sánchez Crespo

D.<sup>a</sup> María Vázquez Rey

D.<sup>a</sup> María Dolores Nariño Facal

D.<sup>a</sup> María Teresa Castro Framil

D.<sup>a</sup> Lucía Calvo de la Uz

D.<sup>a</sup> Margarita Rosende Domínguez

D.<sup>a</sup> Uxía Lemus de la Iglesia

D.<sup>a</sup> María Josefa Argibay da Silva

D. José Manuel Elías Noya

D. Manuel Anxo Fernández Baz

D.<sup>a</sup> Carmen Diéguez González

**Non asiste, previa escusa:**

D. Roberto Moñino Gil

**Secretaría xeral:**

D.<sup>a</sup> Virginia Fraga Díaz

**Interventora:**

D.<sup>a</sup> Mónica I. Lado Varela

**ORDE DO DÍA:**

- 1.- DACIÓN DE CONTA DA COMPOSICIÓN DAS COMISIÓNS INFORMATIVAS**
- 2.- DITAME DA PROPOSTA DA ALCALDÍA DE APROBACIÓN DA CONTA XERAL 2018**
- 3.- DITAME DA PROPOSTA DA ALCALDÍA DE ACORDO DE NON DISPOÑIBILIDADE DE CRÉDITOS E APROBACIÓN DE PLAN ECONÓMICO FINANCIERO: 2019-2020**
- 4.- DITAME DA PROPOSTA DA ALCALDÍA DE APROBACIÓN INICIAL DA MODIFICACIÓN DA ORDENANZA REGULADORA DO PREZO PÚBLICO POLA REALIZACIÓN DE ACTIVIDADES CULTURAI E DEPORTIVAS**
- 5.- DITAME DA PROPOSTA DA ALCALDÍA DE MODIFICACIÓN DO REGULAMENTO DE ORGANIZACIÓN E FUNCIONAMENTO DAS ESCOLAS INFANTÍS MUNICIPAIS DO CONCELLO DE TEO**

Co quórum establecido polas disposicións legais vixentes para a válida constitución do Pleno, o sr. alcalde, sendo as vinte horas, declara público e aberto o acto.

**1.- DACIÓN DE CONTA DA COMPOSICIÓN DAS COMISIÓNS INFORMATIVAS.**

O sr. alcalde da conta da composición das Comisións Informativas segundo o documento incorporado ao expediente, do 20 de agosto de 2019, que se reproduce a continuación:

**“ASUNTO: COMPOSICIÓN DAS COMISIÓNS INFORMATIVAS”**

De acordo co establecido nos artigos 38 e 123 e seguintes do R.D. 2568/1986, de 28 de novembro, polo que se aproba o Regulamento de Organización, Funcionamento e Réxime xurídico das entidades Locais, en relación co artigo 14 do Regulamento Orgánico

Municipal, á vista dos escritos presentados no seu momento polos diferentes grupos políticos, as comisións informativas, creadas por acordo do Pleno do 8 de xullo de 2019 quedarán integradas polos membros que se recollen a continuación, sendo o alcalde o presidente de todas elas.

**Escritos dos grupos políticos:**

SON DE TEO - (REX. ENTRADA Nº 4629, de 10/07/2019)

PSdeG-PSOE- (REX. ENTRADA Nº 398(SEDE), de 09/07/2019)

PP – (REX. ENTRADA Nº 4661, de 12/07/19 E Nº 4900, de 29/07/19 )

BNG - (REX. ENTRADA Nº4655, de 12/07/2019),

**Comisións informativas:**

- 1.- Comisión Informativa de Urbanismo, Infraestruturas, Sostibilidade e Servizos básicos.
- 2.- Comisión Informativa de Administración, Cultura, Educación, Seguridade cidadá, Participación veciñal e Deportes
- 3.- Comisión Informativa de Persoal, Comunicación, Normalización lingüística, Mocidade e Medio Natural.
- 4.- Comisión Informativa de Benestar social, Igualdade, Transportes, Turismo, Comercio e Emprego
- 5.- Comisión Informativa de Facenda e Asuntos Económicos, que asume as funcións da Comisión Especial de Contas.

A composición de todas as Comisións Informativas, será a seguinte:

- 3 concelleiros/as do PP
- 1 concelleiro/a de SONdeTEO
- 2 concelleiros/as do PSdeG-PSOE
- 1 concelleiro/a do BNG

O alcalde é o Presidente nato de todas as Comisións Informativas, porén, a presidencia efectiva poderá delegala en calquera membro da Corporación, a proposta da propia Comisión, tras a correspondente elección efectuada no seu seno

**Composición das Comisións informativas:**

**1.- COMISIÓN INFORMATIVA DE URBANISMO, INFRAESTRUTURAS, SOSTIBILIDADE E SERVIZOS BÁSICOS.**

**Presidente:**

**D. Rafael Sisto Edreira (SdeT)**

**Concelleiros/as:**

**D. José Manuel Guerra Calvelo (PP)**

*Suplente: D.<sup>a</sup> M<sup>a</sup> Dolores Nariño Facal*

**D. Antonio R. Sánchez Crespo (PP)**

*Suplente: María Vázquez Rey*

**D.<sup>a</sup> Lucía Calvo de la Uz (PP)**

*Suplente: D.<sup>a</sup> Margarita Rosende Domínguez*

**D. X. Ignacio Iglesias Villar (SdeT)**

*Suplente: D.<sup>a</sup> Iria Otero Romero*

**D. Roberto Moñino Gil (PSdeG-PSOE)**

*Suplente: D.<sup>a</sup> M.<sup>a</sup> Josefa Argibay da Silva*

**D.<sup>a</sup> Uxía Lemus de la Iglesia (PSdeG-PSOE)**

*Suplente: D. José Manuel Elías Noya*

**D. Manuel Anxo Fernández Baz (BNG)**

*Suplente: D.<sup>a</sup> Carmen Diéguez González*

## **2.- COMISIÓN INFORMATIVA DE ADMINISTRACIÓN, CULTURA, EDUCACIÓN, SEGURIDADE CIDADÁ, PARTICIPACIÓN VECIÑAL E DEPORTES**

### **Presidente:**

**D. Rafael C. Sisto Edreira (SdeT)**

### **Concelleiros/as:**

**D.ª María Vázquez Rey (PP)**

*Suplente: D.ª Lucía Calvo de la Uz*

**D. Antonio R. Sánchez Crespo (PP)**

*Suplente: D.ª Mª Dolores Nariño Facal*

**D.ª Mª Teresa Castro Framil (PP)**

*Suplente: D.ª Margarita Rosende Domínguez*

**D. X. Ignacio Iglesias Villar (SdeT)**

*Suplente: D.ª María López Álvarez*

**D.ª M.ª Josefa Argibay da Silva (PSdeG-PSOE)**

*Suplente: D. Roberto Moñino Gil*

**D.ª Uxía Lemus de la Iglesia (PSdeG-PSOE)**

*Suplente: D. José Manuel Elías Noya*

**D. Manuel Anxo Fernández Baz (BNG)**

*Suplente: D.ª Carmen Diéguez González*

## **3.- COMISIÓN INFORMATIVA DE PERSOAL, COMUNICACIÓN, NORMALIZACIÓN LINGÜÍSTICA, MOCIDADE E MEDIO NATURAL**

### **Presidente:**

**D. Rafael C. Sisto Edreira (SdeT)**

**Concelleiros/as:**

**D.ª María Vázquez Rey (PP)**

*Suplente: D.ª Margarita Rosende Domínguez*

**D.ª Mª Teresa Castro Framil (PP)**

*Suplente: D.ª Lucía Calvo de la Uz*

**D.ª Mª Dolores Nariño Facal (PP)**

*Suplente: D. Antonio R. Sánchez Crespo*

**D.ª María López Álvarez (SdeT)**

*Suplente: D. X. Ignacio Iglesias Villar*

**D.ª M.ª Josefa Argibay da Silva (PSdeG-PSOE)**

*Suplente: D. Roberto Moñino Gil*

**D. José Manuel Elías Noya (PSdeG-PSOE)**

*Suplente: D.ª Uxía Lemus de la Iglesia*

**D.ª Carmen Diéguez González (BNG)**

*Suplente: D. Manuel Anxo Fernández Baz*

**4.- COMISIÓN INFORMATIVA DE BENESTAR SOCIAL, IGUALDADE, TRANSPORTES,  
TURISMO, COMERCIO E EMPREGO**

**Presidente:**

**D. Rafael C. Sisto Edreira (SdeT)**

**Concelleiros/as:**

**D.ª Mª Dolores Nariño Facal (PP)**

*Suplente: D.ª Mª Teresa Castro Framil*

**D.ª Margarita Rosende Domínguez (PP)**

*Suplente: D.<sup>a</sup> Lucía Calvo de la Uz*

**D.<sup>a</sup> María Vázquez Rey (PP)**

*Suplente: D. Antonio R. Sánchez Crespo*

**D.<sup>a</sup> Iria Otero Romero (SdeT)**

*Suplente: D. X. Ignacio Iglesias Villar*

**D.<sup>a</sup> M.<sup>a</sup> Josefa Argibay da Silva (PSdeG-PSOE)**

*Suplente: D. Roberto Moñino Gil*

**D. José Manuel Elías Noya (PSdeG-PSOE)**

*Suplente: D.<sup>a</sup> Uxía Lemus de la Iglesia*

**D.<sup>a</sup> Carmen Diéguez González (BNG)**

*Suplente: D. Manuel Anxo Fernández Baz*

## **5.- COMISIÓN INFORMATIVA DE FACENDA E ASUNTOS ECONÓMICOS, QUE ASUME AS FUNCIÓNS DA COMISIÓN ESPECIAL DE CONTAS**

### **Presidente:**

**D. Rafael C. Sisto Edreira (SdeT)**

### **Concelleiros/as:**

**D. José Manuel Guerra Calvelo (PP)**

*Suplente: D. Antonio R. Sánchez Crespo*

**D.<sup>a</sup> Margarita Rosende Domínguez (PP)**

*Suplente: D.<sup>a</sup> M<sup>a</sup> Teresa Castro Framil*

**D.<sup>a</sup> Lucía Calvo de la Uz (PP)**

*Suplente: D.<sup>a</sup> M<sup>a</sup> Dolores Nariño Facal*

**D.<sup>a</sup> Iria Otero Romero (SdeT)**

*Suplente: D.<sup>a</sup> María López Álvarez*

**D. Roberto Moñino Gil (PSdeG-PSOE)**

*Suplente: D.<sup>a</sup> M.<sup>a</sup> Josefa Argibay da Silva*

**D.<sup>a</sup> Uxía Lemus de la Iglesia (PSdeG-PSOE)**

*Suplente: D. José Manuel Elías Noya*

**D. Manuel Anxo Fernández Baz (BNG)**

*Suplente: D.<sup>a</sup> Carmen Diéguez González*

Teo, 20 de agosto de 2019

O alcalde,

Rafael C. Sisto Edreira”

O Pleno da Corporación toma coñecemento.

## **2.- DITAME DA PROPOSTA DA ALCALDÍA DE APROBACIÓN DA CONTA XERAL 2018.**

O sr. alcalde da conta da proposta de 1 de outubro de 2019, que se recolle a continuación.

### **“PROPOSTA DA ALCALDÍA**

Visto o expediente da Conta Xeral do Concello de Teo correspondente ao exercicio 2018, formada segundo o establecido no artigo 208 do Real Decreto legislativo 2/2004, de 5 de marzo, polo que se aproba o Texto Refundido da Lei reguladora das Facendas Locais, e co contido sinalado no artigo 209.

Considerando que devandita Conta Xeral foi informada favorablemente pola Comisión Informativa Especial de Contas, Facenda e Asuntos Económicos, na súa sesión extraordinaria celebrada en data 20/08/2019.

Tendo en conta que a Conta Xeral correspondente ao exercicio 2018 estivo exposta ao público durante quince días hábiles, mediante anuncio inserido no Boletín Oficial da



Provincia (BOP) nº 162, de data 28/08/2019, podendo as persoas interesadas presentar reclamacións, reparos ou observacións durante devandito prazo de quince días hábiles e oito máis.

Considerando que durante o prazo legalmente establecido non se presentaron reclamacións, reparos ou observacións, segundo consta no informe emitido polos servizos xerais.

En virtude do exposto, e de acordo co establecido no artigo 212.4 do TRLRFL, propónse AO PLENO:

**Primeiro**.- Aprobar a Conta Xeral do Concello de Teo correspondente ao exercicio 2018.

**Segundo**.- Render a Conta Xeral así aprobada e toda a documentación que a integra ao Tribunal de Cuentas, tal e como se establece no artigo 212.3 do TRLRFL, así como ao Consello de Contas de Galicia, segundo o establecido no artigo 25.2 da Lei 6/1985, de 24 de xuño, do Consello de Contas.

**Terceiro**: Enviar ao Ministerio de Facenda e Administracións Públicas a Conta Xeral 2018, nos termos que indica a Orde HAP/2105/ 2012, de 1 de outubro.

Teo, 1 de outubro de 2019

O ALCALDE

Rafael Sisto Edreira”

O sr. alcalde explica que a conta é un documento contable feito polo departamento de intervención, polo que non se trata de discutir se o que se gastou foi ben ou mal gastado, xa que para iso está o orzamento e a liquidación, senón se as contas foron así ou non.

Refírese o sr. alcalde ás conclusións do informe de intervención e salienta que no mesmo se recolle un resultado orzamentario positivo e un remanente de tesourería positivo e o nivel de endebedamento no 0,42 %.

Aberta a primeira quenda de intervencións, o portavoz do BNG, sr. Fernández, sinala que vaia por diante que se trata da conta xeral do 2018 vinculada ao orzamento prorrogado

aprobado en xullo do 2017. No 2018 existiron modificacións importantes, unhas normais, ao tratarse dun orzamento prorrogado, e outras vinculadas ao préstamo do IDAE e ao POS, entre outros temas. Tratándose dos reparos insiste o sr. Fernández na necesidade de reducilos ao máximo, para así evitar ter que proceder ao seu levantamento. Sinala que se trata dunha conta xeral que amosa uns indicadores bastante positivos, tal e como se reflicte nos informes de intervención, comezando polo resultado orzamentario e rematando polo remanente líquido de tesourería.

Remata o sr. Fernández a súa intervención sinalando que a súa posición vai a estar vinculada á posición que tiveron en relación co orzamento orixinal ao que vai vinculado dalgunha maneira esta conta xeral.

A portavoz do PSdeG-PSOE, sra. Lemus, non fai uso da súa quenda de intervención.

Intervén o portavoz do PP, sr. Guerra, quen lle cede a palabra á concelleira do seu grupo D.<sup>a</sup> Lucía Calvo de la Uz.

A sra. Calvo di que saben que se trata dun documento técnico, unha foto fixa da realidade, porén supón que todos serán conscientes de que se non se cumpre cos prazos se bloquearía a posibilidade de acceso a subvencións e se incorrería nunha grave irresponsabilidade por parte do goberno, engadindo que, aínda que se está en prazo, vaise ao límite. Salienta a sra. Calvo que a conta xeral está presentada tarde, mal e arrastro e lembra que na anualidade 2018 se presentou o 26 de setembro e nesta anualidade no día de hoxe, 9 de outubro, e o prazo remata o 15 deste mes.

Quere a sra. Calvo deixar claro que dos informes de intervención se desprende a mala xestión do goberno por cousas como as que vai a detallar. Sinala que se incumpre a regra de gasto, hai catorce reparos, irregularidades nas nóminas dalgunos traballadores e cousas tan graves como que do remanente de tesourería chama a atención os case 2,7 millóns de euros de dereitos pendentes de cobro de exercicios xa pechados, a non recadación en vía executiva da taxas de auga, sumidoiros e depuración, engadindo que estas reclamacións permanecen paralizadas dende 2012. Pregunta a sra. Calvo qué é o que pasa, se é que uns veciños pagan e outros non.

Sinala a sra. Calvo que no informe de intervención se reflicte claramente o que acaba de dicir, que non se reclaman polo vía executiva as taxas de saneamento, alcantarillado e depuración dende o ano 2012 aos veciños que no seu momento non pagaron. Sinala que tendo en conta que so se poden reclamar os últimos catro anos, está claro que se perdeu o ingreso da friolera de case 2,7 millóns de euros.

Espera a sra. Calvo que o sr. alcalde teña unha boa explicación, que lle gustará escoitar, e pregunta se é xusto para os/as veciños/as de Teo que uns paguen e outros non, engadindo que haberá que depurar responsabilidades porque non é que isto sexa grave senón que é gravísimo. Considera a sra. Calvo que do estudo da liquidación extráese unha moi baixa execución do capítulo 6 en investimentos de gasto, posto que dos 8,8 millóns de euros a penas se executaron 4 millóns, por tanto por debaixo do 50 %. Pregunta a qué obedece isto, tendo en conta que todos eran investimentos necesarios para o Concello, e porque non se executaron, engadindo que se trata doutra cuestión inexplicable.

Tratándose de vertente de ingresos, pregunta a sra. Calvo como é posible que dos 3.000.000 € estimados de ingresos de taxas so se recollan 2.200.000 €, o que quere dicir é que hai unha sobreestimación á hora de orzamentar. Sinala que isto é o que se deriva do informe de intervención, engadindo que iso mesmo volve a suceder no capítulo 6 de ingresos, xa que dos 120.000 € que se contemplan, non se recoñece ningún dereito, polo que clarisimamente se está inflando a conta, tal e como di a intervención.

Sinala a sra. Calvo que ambas situacións son unha imprudencia flagrante, porque inflar ingresos da lugar a un maior gasto e provoca desequilibrio orzamentario, porque se non se recada daría lugar a déficit e tensións na tesourería municipal. Considera a sra. Calvo que hai que ter máis sentido e non se pode gastar máis cartos dos que se recadan, engadindo que o orzamento de ingresos debe estar consignado de acordo ao principio de prudencia. Pide a sra. Calvo que non se inflen as contas, que despois da lugar a maior gasto.

Sinala a sra. Calvo que das tres regras incúmprese dúas, a regra de gasto e a estabilidade orzamentaria. Lembra que o concello está suxeito ao cumprimento do Plan

de axuste 2012-2020, aprobado con ocasión do mecanismo de pago a provedores, e non se está a cumprir.

Di a sra. Calvo que, por resumir, hai de todo, reparos, incumprimentos de todo tipo, dubidoso cobro, contratos menores con informes desfavorables e sen fiscalización previa, etc, etc.

Remata a sra. Calvo a súa intervención sinalando que, despois de todo o exposto, o voto do seu grupo será negativo, engadindo que supón que non será unha sorpresa, porque aínda que o miraran con cariño é imposible aceptar isto.

O sr. alcalde sinala que a sra. Calvo comezou dicindo que era un documento contable, polo tanto parten de que hai algunha conta mal, porque para non aprobar as contas se supón que hai algunha conta que falla, que hai algo que está mal reflectido, que hai algo que se gastou que non está reflectido, porque se non se aproban as contas o que se fai é unha interpretación política de cómo se fixo a xestión económica.

O sr. alcalde considera que a sra. Calvo ten todo o dereito do mundo a facer esa interpretación política e aínda que considera que non é o sitio, podería selo, pero á hora de votar as contas, non se entende moi ben, porque as contas ou están ben ou están mal contabilizadas.

Sinala o sr. alcalde que xa que se fixo unha crítica política, vai a responder algunha cousiña.

O sr. alcalde sinala que todo o razoamento da sra. Calvo ten un fallo, se fala de que non se pode gastar máis do que se ingresa, e pregunta que cómo é que hai 808.855,98 € de superávit, engadindo que iso non pode responder máis que a que se ingresou máis do que se gastou, senón non pode haber superávit. Polo tanto, aínda existindo partes nas que ten razón a sra. Calvo, a argumentación xeral caese, porque senón non podería existir superávit.

Sinala que existen cuestións que a sra. Calvo non controla porque non estivo aquí e explica que os 2,7 millóns de euros do tema de augas non é porque os veciños non pagaran, senón que é porque o que non pagou é Aquaguest, tratándose dun tema que está no Xulgado. Sinala que independentemente de que non se fixera a recadación executiva, hai que ter en conta que está delegada na Deputación e ninguén no Concello dou unha orde de que non se fixese, polo que non pode ser culpa da Alcaldía. Considera o sr. alcalde que neste punto a sra. Calvo non ten razón, aínda que si a ten por exemplo no tema dos reparos, engadindo que costa moito axustar a economía e o funcionamento económico do Concello á nova regulamentación porque hai as limitacións que hai para contratación. Neste momento esta sen contratar case todo o POS 2018, cos expedientes enriba da mesa de Secretaría, porque non se da para máis.

Sinala o sr. alcalde que hai que sacar os contratos, porén non é por unha falta de vontade ou porque os/as responsables políticos/as non fagan o seu traballo, porén as limitacións as veces son duras nese senso.

Explica o sr. alcalde que o Consello de Contas fai unha serie de recomendacións para reducir por exemplo o tema dos reparos, como poñer controles internos de supervisións, e se vai a facer, porén non é tanto unha deixadez política senón que non se conta con persoal suficiente. Explica que este ano viu terriblemente esfarelado dende o punto de vista de control, coa administración electrónica, e así se antes se facían dous ou tres mesas de contratación nunha mañá, agora se necesitan varias mañás para facer unha soa mesa. Sinala que hai que conseguir facelo, porén é algo que non se consegue de hoxe para mañá. Explica o sr. alcalde que é certo que no remanente de tesourería están eses dereitos de dubidoso cobro, e aclara que hai que mantelos aí porque se está pendente dunha resolución xudicial, e quitalos significaría recoñecer que non se ten dereito a eles, e iso sería un arma para o enemigo. Remata o sr. alcalde a súa intervención sinalando que, aínda que sobre eses temas de política económica teñan que falar e discutir moito, hoxe o que se valora é un documento contable, engadindo que entende a crítica política porén lle costa máis entender un voto negativo, porque ao final é cuestión de sumar e restar, e se está ben, para ben ou para mal, é que foi así.

Co permiso da presidencia, a interventora municipal e sinala que a Conta ten que quedar aprobada para a súa remisión ao Consello de Contas.

O sr. alcalde sinala que se o Pleno non aproba a Conta, non se pode remitir.

Aberta a segunda quenda de intervencións, o portavoz do grupo mixto, sr. Fernández, e a portavoz do PSdeG-PSOE, sra. Lemus, non fan uso das súas quendas de intervención.

Intervén a concelleira do PP, D.<sup>a</sup> Lucía Calvo de la Uz, e sinala que a súa intervención foi unha crítica construtiva, porque o primeiro que dixo é que era un documento técnico, unha foto fixa da realidade. Pregúntalle ao sr. alcalde onde quere que diga todo o que dixo, no campo de fútbol ou no Pleno.

O sr. alcalde respóndelle que na liquidación orzamentaria.

A sra. Calvo sinala que ela quere deixar constancia agora e aquí. Indica que o sr. alcalde lle di que está reclamado vía xudicial e pregunta polos 14 reparos sinalando que segundo o alcalde son culpa dos técnicos. A sra. Calvo pídelle ao sr. alcalde que llo explique porque o quere entender.

O sr. alcalde sinala que hai reparos de todo tipo. Explica que hai contratos menores que se repiten sistematicamente, como a desratización, que son contratos bastante pírricos. Salienta que nas mesas de contratación hai moitos expedientes pendentes e leva moito tempo sacalos. Sinala que a responsabilidade final é do goberno, ou porque non é capaz de buscar os mecanismos para contratar o persoal necesario ou polo que sexa, porén cada un dos reparos se poderían xustificar, engadindo que cada reparo é un mundo. Sinala que hai cen mil facturas que van sen retención de crédito, debéndose ter en conta que hai que facer un proceso para reter, por exemplo 75 €, porén hai que facelo porque senón é un reparo.

A sra. Calvo sinala que se trata de cartos públicos.

O sr. alcalde sinala que hai que ter coidado porque o feito de facer a retención de crédito inicial é para asegurar que existe crédito para pagalo e nunca pasou que non existise crédito para pagar unha factura e ningunha factura se deixou de pagar, todas se pagaron,

porque había crédito, o que faltou foi o proceso administrativo de cubrir un papel para que a intervención valorase se había ou non crédito. Sinala que a veces con facturas pequenas se salta ese paso, aínda que non estea ben feito, porén non é que se trate de cartos públicos con menos control, engadindo que o grave sería realizar un gasto se ter a dispoñibilidade orzamentaria. Salienta o sr. alcalde que no goberno se recalca moito que cada concelleiro/a ten que se responsable do seu orzamento, ao igual que na súa casa, reiterando que a retención de crédito deber facerse en montantes grandes e pequenos, porén, sobre todo nestes últimos, a veces iso se salta.

Sinala o sr. alcalde que tamén existen circunstancias excepcionais que provocan que, por distintas causas, non se fai retención en suposto de maior importe, e asumen a responsabilidade, e neste senso o espazo para mellorar é moito, co mesmo argumento que antes, porén non hai nin un so euro de cartos públicos que non se saiba a onde foi, ou quen autorizou o gasto ou que non houbera cartos para pagar, polo tanto se leva unha xestión económica bastante responsable, e por riba hai un superávit de 800.000 €, polo tanto mal de todo non se fai, aínda que a sra. Calvo teña razón nalgunhas cousas que dixo.

Non habendo máis intervencións e sometida a proposta a votación, prodúcese o seguinte resultado:

- Votos a favor – 7 (4 Son de Teo e 3 PSdeG-PSOE)
- Votos en contra – 7 (PP)
- Abstencións – 2 (BNG)

Producíndose un resultado de empate, sométese a proposta novamente a votación, obténdose o seguinte resultado:

- Votos a favor – 7 (4 Son de Teo e 3 PSdeG-PSOE)
- Votos en contra – 7 (PP)
- Abstencións – 2 (BNG)

Persistindo o resultado de empate, decide o voto de calidade do alcalde.

De acordo co exposto, o Pleno da Corporación, con sete votos a favor (4 Son de Teo e 3 PSdeG-PSOE), sete en contra (7 PP) e dúas abstencións (2 BNG), decidindo o voto de calidade do Presidente, acorda:

**Primeiro**.- Aprobar a Conta Xeral do Concello de Teo correspondente ao exercicio 2018.

**Segundo**.- Render a Conta Xeral así aprobada e toda a documentación que a integra ao Tribunal de Cuentas, tal e como se establece no artigo 212.3 do TRLRFL, así como ao Consello de Contas de Galicia, segundo o establecido no artigo 25.2 da Lei 6/1985, de 24 de xuño, do Consello de Contas.

**Terceiro**: Enviar ao Ministerio de Facenda e Administracións Públicas a Conta Xeral 2018, nos termos que indica a Orde HAP/2105/ 2012, de 1 de outubro.

### **3.- DITAME DA PROPOSTA DA ALCALDÍA DE ACORDO DE NON DISPOÑIBILIDADE DE CRÉDITOS E APROBACIÓN DE PLAN ECONÓMICO FINANCIERO: 2019-2020.**

O sr. alcalde da conta da proposta de 30 de setembro de 2019, que se recolle a continuación, ditaminada favorablemente pola Comisión Informativa de Facenda e Asuntos Económicos, que asume as funcións da Comisión Especial de Contas, de 3 de outubro de 2019.

#### **“PROPOSTA DA ALCALDÍA**

#### **PLAN ECONÓMICO-FINANCIERO AOS EFECTOS DO CUMPRIMENTO DA REGRA DE GASTO E A ESTABILIDADE ORZAMENTARIA**

O informe de Intervención sobre a liquidación do exercicio 2018 de 27 de maio de 2019 constata o incumprimento da estabilidade orzamentaria e da regra de gasto, o que esixe, de conformidade co disposto nos artigos. 21 e 23 da LOEPSF, a formulación dun Plan Económico Financeiro que permita no ano en curso e no seguinte cumprir cos referido parámetros.

Estes datos da liquidación orzamentaria do exercicio 2018 foron remitidos ao *Ministerio de Hacienda* ao abeiro do artigo 15.4 da Orde HAP 2105/2012, de 1 de outubro, pola que se desenvolven as obrigas de subministración de información previstas na Lei orgánica



2/2012, do 27 de abril, de estabilidade orzamentaria e sustentabilidade financeira (LOEOSF).

Consecuentemente, con data do 3 de xullo de 2018 a Dirección Xeral de Política Financeira e do Tesouro e Fondos Europeos da Consellería de Facenda da Xunta de Galicia, remitiu escrito a esta Alcaldía extraendo das regras fiscais o resultado dun incumprimento da regra de gasto de 572.670,19€ e unha capacidade de financiamento de 870.145,43€, do que se conclúe a necesidade dun acordo de non dispoñibilidade de créditos (AND) por 588.132,90€ e da aprobación dun novo PEF 2019-2020.

A orixe deste desaxuste está na participación do concello de Teo no programa de axudas para a renovación das instalacións de alumeado exterior municipal convocadas polo IDAE (Ministerio de Energía, Turismo y Agenda digital. Resolución do 28 de abril publicada no BOE do 5 de maio de 2015), aprobada polo Pleno da Corporación o 28 de abril de 2016 sen ningún voto en contra.

A resolución do Consello de Administración do Instituto para a Diversificación e Aforro da Enerxía (IDAE) do 20 de decembro de 2016 favorable á solicitude da axuda solicitada polo concello de Teo, complementada coa resolución do mesmo órgano asinada o 13 de febreiro de 2018, concedeu un préstamo reembolsable por 2.716.886,86€ a interese do 0.0%, que deu lugar á escritura pública de contrato de préstamo asinado en Madrid o 15 de marzo de 2018, e ao ingreso desta cantidade nas arcas municipais con data do 5 de abril de 2018.

A execución do contrato asinado coa empresa *Asistencia y Soluciones de Arquitectura e Ingeniería SL* (ASAI) por un importe total de 2.671.536,06€ (IVE incluído) como resultado do procedemento público aberto para a execución do “Proxecto de obras de renovación das instalacións de alumeado público exterior do Concello de Teo”, deu lugar a aprobación das dez certificacións de obra e das correspondentes facturas polo importe total do contrato, a última delas en marzo de 2019.

A contabilización das facturas do proxecto recoñecidas e pagadas ao longo do exercicio 2018 supuxeron un importe total de 2.182.819,59€, incorporadas no capítulo 6 de gastos non financeiros do exercicio. O ingreso do préstamo recibido compútase no capítulo 9 de ingresos, polo que non se contabiliza como “ingreso non financeiro”, orixinando o

incumprimento da estabilidade orzamentaria en 870.144,74€ e o incumprimento da regra de gasto en 572.670,79€.

Tendo en conta os datos reflectidos no Informe de Intervención sobre a liquidación do exercicio do 2018 asinada o 27 de maio de 2019, que sinala un resultado orzamentario axustado de +808.855,98€, así como a evolución do Remanente líquido de Tesourería para Gastos Xerais (RLTGG) e o nivel de endebedamento nos últimos exercicios, a situación económico-financeira do Concello é estable e solvente.

Tendo en conta que a Auditoría enerxética na que se basea o proxecto de renovación financiado polo IDAE indica que a súa execución vai supoñer un aforro anual en consumo de 283.728,57€, sen contabilizar nin o aforro por redución de potencia contratada nin o aforro estimado polo incremento nas tarifas eléctricas nos próximos anos, polo que a redución de custos anuais vai permitir a devolución da cota anual de capital (ao interese do 0%) e un importante aforro a maiores.

Proponse ao Pleno a adopción do seguinte **ACORDO**:

**Primeiro**.- Aprobar o Plan Económico-Financeiro 2019-2020 que acompaña esta proposta e publicalo no Boletín Oficial da Provincia

**Segundo**.- Aprobar o acordo de non dispoñibilidade de créditos (AND) para o exercicio 2019 que esta proposta incorpora como ANEXO

**Terceiro**.- Remitir o PEF 2019-20, para o seu coñecemento á *Comisión Nacional de Administración Local* e a Dirección Xeral de Política Financeira e do Tesouro da Consellería de Facenda

**Cuarto**.- Efectuar as comunicacións telemáticas que procedan en cumprimento das obrigas contempladas na Orde HAP/2015/2012 de 1 de outubro, pola que se desenvolven as obrigas de subministro de información previstas na Lei Orgánica 2/2012 de 27 de abril de Estabilidade Orzamentaria e Sostibilidade Financeira (LOEPSF).

Teo, 30 de setembro de 2019

Asdo: Rafael C. Sisto Edreira

## ANEXO

partida orzamentaria	capitulo	data de aprobacion	data de aplicación efectiva	efecto económico exercicio 2019
132/12001	1	25/09/19	26/09/19	10.132,90
132/12101	1	25/09/19	26/09/19	22.000,00
132/16000	1	25/09/19	26/09/19	20.000,00
151/12001	1	25/09/19	26/09/19	10.000,00
151/15000	1	25/09/19	26/09/19	2.000,00
161/15000	1	25/09/19	26/09/19	3.000,00
170/15000	1	25/09/19	26/09/19	500,00
170/15100	1	25/09/19	26/09/19	500,00
170/22706	2	25/09/19	26/09/19	5.000,00
170/22799	2	25/09/19	26/09/19	10.000,00
170/62900	6	25/09/19	26/09/19	20.000,00
171/15000	1	25/09/19	26/09/19	1.500,00
171/15100	1	25/09/19	26/09/19	1.500,00
230/15000	1	25/09/19	26/09/19	5.000,00
241/22100	2	25/09/19	26/09/19	220.000,00
312/15100	1	25/09/19	26/09/19	1.000,00
312/21200	2	25/09/19	26/09/19	2.000,00
320/15100	1	25/09/19	26/09/19	2.000,00
330/13000	1	25/09/19	26/09/19	20.000,00
330/16000	1	25/09/19	26/09/19	5.000,00
334/22606	2	25/09/19	26/09/19	1.000,00
334/22609	2	25/09/19	26/09/19	9.000,00
340/15000	1	25/09/19	26/09/19	1.000,00
430/60900	6	25/09/19	26/09/19	30.000,00
430/61900	6	25/09/19	26/09/19	29.000,00
440/22602	2	25/09/19	26/09/19	5.000,00
450/13000	1	25/09/19	26/09/19	38.000,00
450/15000	1	25/09/19	26/09/19	2.000,00
450/15100	1	25/09/19	26/09/19	1.000,00
912/10000	1	25/09/19	26/09/19	5.000,00
912/48000	4	25/09/19	26/09/19	1.000,00
920/13000	1	25/09/19	26/09/19	40.000,00
920/15000	1	25/09/19	26/09/19	1.000,00
931/12000	1	25/09/19	26/09/19	13.000,00
931/12100	1	25/09/19	26/09/19	8.000,00
931/12101	1	25/09/19	26/09/19	20.000,00
931/15000	1	25/09/19	26/09/19	2.000,00
931/15100	1	25/09/19	26/09/19	1.000,00
931/68100	1	25/09/19	26/09/19	20.000,00

Obra no expediente informe de intervención, do 30 de setembro de 2019, que se reproduce a continuación.

## **“ INFORME DE INTERVENCIÓN**

### **ASUNTO: APROBACION PLAN ECONÓMICO FINANCEIRO 2019/2020.**

Coa finalidade de dar cumprimento ao disposto pola Ley Orgánica 2/2012, de 27 de abril, de Estabilidade Orzamentaria e Sostenibilidade Financeira, vixente dende o 01/05/2012, e modificada pola Lei Orgánica 9/2013, de 20 de decembro, de control da débeda comercial no sector público e Lei Orgánica 1/2016, de 31 de outubro, esta Intervención emite o seguinte informe, en relación có PEF 2019/2020 que agora se presenta:

### **1º.-PRINCIPIOS XERAIS**

A Ley Orgánica 2/2012, de 27 de abril, de aplicación ás Entidades Locais enumera unha serie de principios xerais e procedementos a que debe axeiarse a política orzamentaria do sector público, os mais relevantes son:

#### **PRINCIPIO DE ESTABILIDADE ORZAMENTARIA.-Artigo 3.**

“1.-A elaboración, aprobación e execución dos Orzamentos e demais actuacións que afeten aos gastos ou ingresos dos distintos suxeitos comprendidos no ámbito de aplicación desta lei se realizará nun marco de estabilidade orzamentaria, coherente coa normativa europea.

2.-Se entenderá por estabilidade orzamentaria das Administracións Públicas a situación de equilibrio ou superávit estrutural.”

#### **PRINCIPIO DE SOSTENIBILIDADE FINANCEIRA.-Artigo 4.**

“1.-As actuacións das Administracións Públicas e demais suxeitos comprendidos no ámbito de aplicación desta lei estarán suxeitas ao principio de sostenibilidade financeira.

2.-Se entenderá por sostenibilidade financeira a capacidade para financiar compromisos de gasto presentes e futuros dentro dos límites de déficit e débeda pública, conforme ao establecido nesta lei e na normativa europea.

Se entende que existe sostenibilidade da débeda comercial, cando o período medio de pago aos provedores non supere prazo máximo previsto na normativa sobre morosidade.”

## **2º.- ESTABILIDADE ORZAMENTARIA.**

### A) INSTRUMENTACIÓN

O artigo 11 da Lei Orgánica 2/2012, de 27 de abril, dispón:

“1.-A elaboración, aprobación e execución dos orzamentos e demais actuacións que afecten aos gastos e ingresos das Administracións Públicas e demais entidades que forman parte do sector público se someterá ao principio de **estabilidade orzamentaria**.

2.- Ningunha Administración poderá incurrir en déficit estrutural, definido como déficit axustado de ciclo, neto de medidas excepcionais e temporais

...

4.-As Corporacións Locais deberán manter unha posición de equilibrio ou superávit orzamentario.

...

6.-Para o cálculo do déficit estrutural se aplicará a metodoloxía utilizada pola Comisión Europea no marco da normativa de estabilidade orzamentaria.”

### **B) CÁLCULO DA ESTABILIDADE ORZAMENTARIA**

Ven determinada pola diferenza entre os capítulos 1 a 7 do estado de Ingresos, e os capítulos 1 a 7 do estado de gastos, e sobre dita diferenza se practicarán os axustes que indica Manual de Cálculo del Déficit en Contabilidad Nacional adaptado a las Corporaciones Locales.

### **3º.-SOSTENIBILIDADE FINANCEIRA**

#### A) INSTRUMENTACIÓN

Regulada no artigo 13 da lei:

“1.-O volumen de débeda pública, definida de acordo có Protocolo sobre Procedemento de déficit excesivo, do conxunto das Administracións Públicas non poderá superar o 60% do PIB nacional expresado en termos nominais, ou o que se establezca pola normativa europea.

Este limite se distribuirá de acordo cós seguintes porcentaxes, expresados en termos nominais do PIB nacional: 44% para a Administración central, 13% para o conxunto de CCAA e 3% para o conxunto das Corporacións Locais.”

### **4º.-REGRA DE GASTO**

#### A) DEFINICIÓN

O artigo 12 regula a regra de gasto:

“1.- A **variación do gasto computable** da Administración central, das Comunidades Autónomas e3 das Corporacións Locais, non poderá superar a **taxa de referencia de crecemento** do PIB de medio prazo da economía española.

2.-Se entenderá por gasto computable ...os empregos non financeiros definidos no Sistema Europeo de Contas Nacionais e Rexionais, excluídos os xuros da débeda, o gasto non discrecional en prestacións por desemprego, a parte do gasto financiado con fondos finalistas procedentes da UE ou doutras administracións públicas e as transferencias ás CCAA e ás EELL vencelladas aos sistemas de financiación.

3.-Corresponde ao Ministerio de Economía e Competitividade calcular a taxa de referencia de crecemento do PIB de medio prazo da economía española...Esta taxa se publicará no informe a que se refire o artigo 15.5 desta Lei. Será a referencia a ter en

conta pola Administración Central e cada unha das CCAA e CCLL na elaboración dos seus respectivos Orzamentos.”

### **5º.-MEDIDAS PREVENTIVAS, CORRECTIVAS E COERCITIVAS- P.E.F.**

O artigo 18 establece:

1.-As Administracións Públicas farán un seguimento dos datos da execución orzamentaria e axustarán o gasto público para garantir que ao peche do exercicio no se incumple o obxectivo de estabilidade orzamentaria.

E o 19 advirte:

1.-En caso de apreciar un risco de incumprimento da estabilidade orzamentaria, do obxectivo de débeda pública ou da regra de gasto...das Corporacións Locais, o Goberno, a proposta do Ministerio de Facenda e Administracións Públicas, formulará unha advertencia motivada á Administración responsable previa audiencia á mesma...dita advertencia se fará pública a efectos de xeral coñecemento.

2.-A Administración advertida terá o prazo de un mes para adoptar as medidas necesarias para evitar o risco, que serán comunicadas ao Ministerio de Facenda e Administracións Públicas. Se non se adoptasen as medidas ou o Ministerio de Facenda apreciase que son insuficientes para correxir o risco, se aplicarán as medidas correctivas previstas nos artigos 20,21 e 25.1ª).

Para correxir o incumprimento anterior, o artigo 21 prevee:

**1.-En caso de incumprimento do obxectivo de estabilidade orzamentaria, do obxectivo de débeda ou da regra de gasto, a administración incumpridoda formulará un plan económico-financeiro que permita no ano en curso, e no seguinte o cumprimento dos obxectivos ou da regra de gasto, có contido e alcance previstos neste artigo.**

E o 23 regula a súa tramitación:

1.-Os plans económico-financeiros ... serán presentados ante os órganos contemplados nos apartados seguintes no prazo máximo de un mes dende que se constate o incumprimento... Estes plans deberán ser aprobados por ditos órganos no prazo máximo de dous meses dende a súa presentación e a súa posta en marcha non poderá exceder de tres meses dende a constatación do incumprimento.

4.-Os plans económico-financeiros elaborados polas CCLL deberán estar aprobados polo Pleno da Corporación.

...

Os plans económico-financeiros se remitirán á Comisión Nacional de Administración Local. Se dará a estes plans a mesma publicidade que a establecida polas leis para os Orzamentos da Entidade.

O artigo 24 estipula:

1.-O MHAP, elaborará trimestralmente un informe de seguemento da aplicación das medidas contidas nos plans económico-financeiros, para o cal recabará a información necesaria.

3.-En caso de que nos informes de seguemento se verifique unha desviación en aplicación das medidas, o MHAP requerirá á Administración responsable para que xustifique dita desviación, aplique as medidas ou, no seu caso, inclúa novas medidas que garantan o cumprimento do obxectivo de estabilidade.

Finalmente, os artigos 25 e 26 recollen medidas coercitivas en caso de incumprimento:

**-En caso de falta de presentación, de falta de aprobación ou de incumprimento do plan económico-financeiro ...a Administración Pública responsable deberá:**

a) aprobar no prazo de 15 días dende que se produza o incumprimento, a **non dispoñibilidade de créditos** que garantan o cumprimento do obxectivo establecido.



De non adoptarse esta medida, ou en caso de ser insuficiente, será nomeada unha comisión de expertos que valorará a situación económica real do concello e imporá as regras de obrigado cumprimento por parte da entidade.

b) constituír un **depósito con xuros** no Banco de España equivalente ao 0,2% do seu PIB nominal.

**-En caso de incumprimento das medidas anteriores, o Goberno ou no seu caso, a CCAA que teña atribuída a tutela financeira, requerirá ao Presidente da Corporación para que as adopte, e, en caso de novo incumprimento, a CCAA adoptará as medidas para o seu cumprimento forzoso.**

**A persistencia no incumprimento dalgunha das obrigas anteriores, cando supoña o incumprimento do obxectivo de estabilidade orzamentaria, do obxectivo de débeda pública ou da regra de gasto, poderá considerarse como xestión gravemente dañosa para os intereses xerais, e poderá procederse á disolución dos órganos da CCLL incumplidora.**

## **6º.-CONCLUSIONS**

Tras examinar o Plan económico financeiro que se presenta se comproba que:

1º.-O Plan vai precedido do acordo requerido de indispoñibilidade de créditos por importe de 588.132,90€, neste punto a fiscalización é favorable.

2º.- O plan se presenta fóra fora do prazo de un mes dende que se constatou o incumprimento.

3º.- O plan permitirá correxir os desequilibrios en canto a regra de gasto e estabilidade orzamentaria en prazo de dous anos.

Polos motivos expostos a que suscribe non atopa motivos para informar desfavorablemente o plan económico financeiro 2019 a 2020 coa excepción relativa ao prazo.

Teo, 30 de setembro de 2019

A interventora

Mónica Isabel Lado Varela”

Faise constar que se incorpora como anexo á presente o “PLAN ECONÓMICO-FINANCIERO DO CONCELLO DE TEO 2019/2020 AOS EFECTOS DO CUMPRIMENTO DA REGRA DE GASTO E A ESTABILIDADE ORZAMENTARIA”

O sr. alcalde explica que pasou o que sabían que ía a pasar. Sinala que cando no Pleno decidiron solicitar o plan do IDAE para a renovación do alumado público se sabía que se se concedía o crédito ían a pasar dúas cousas. Unha é que se ían a ter que gastar tres millóns e pico de euros, naquel momento, aínda que finalmente foron dous millóns seiscientos mil euros, nun único exercicio económico, e que iso faría saltar a regra de gasto. O sr. alcalde salienta que non discuten que se saltaron a regra de gasto, o que discuten é porque teñen quer ter a regra de gasto, porque o Concello ten que ter un control financeiro, superávit no orzamento, recursos, porén é administración tutelada, que non pode asumir un custo, xa que a alternativa sería non asumir o custo de renovación do alumado, non conseguir un aforro, certificado polo IDAE, do 70% no consumo eléctrico, e seguir gastando máis e máis. Lembra o sr. alcalde que había lámparas de mercurio que era unha situación tercer mundista enerxeticamente.

Salienta que se quería facerse supoñía saltarse a regra de gasto e agora teñen que adoptar os mecanismos que a Lei, se estea ou non de acordo con ela, impón para poder corrixir esa situación. Explica que tamén acontece outra contradición, que espera que alguén lle explique algunha vez, ao tratarse dun préstamo como non se chega ao 75 %, senón so ao 42 %, non se necesita pedir permiso á Comunidade Autónoma para endebedarse, porén se te endebedas como neste caso, para facer este cambio que é fundamental para a economía do concello, se computa o gasto pero non o ingreso, e iso da lugar a un desequilibrio orzamentario, algo que tamén se sabía que ía a acontecer. O sr. alcalde sinala que previamente se valorou a situación, e o mecanismo é que agora hai que facer un acordo de non dispoñibilidade de créditos por un importe semellante ao que se excederon na regra de gasto, e un pouquiño máis, e asegurarse de que na liquidación

do orzamento deste ano va a cumprir todos parámetros. Salia que iso foi o que se fixo e polo tanto buscáronse ese cartos dos que non van a dispoñer, polo que este ano, de forma absurda, xa se vai a ter un superávit de 588.000 €, e logo se dirá que non se executou o orzamento, porén é o que di a Lei, se fai e xa está. O sr. alcalde sinala que van controlando ben o orzamento deste ano, os estados de liquidación amosan que van dentro do cumprimento da regra de gasto, e se farán os axustes necesarios, de aquí a final de ano, para que a liquidación quede conforme a lei di que ten que quedar.

Aberta a primeira quenda de intervencións, o portavoz do BNG, sr. Fernández, sinala que é o segundo plan económico financeiro, nos últimos dous anos, e o terceiro se se ten en conta o período dende o ano 2012. O primeiro aínda está vixente e, segundo o informe de intervención, non se está cumprindo nalgúns dos parámetros contemplados, e o segundo foi consecuencia da liquidación do exercicio 2016 e no que se constataba o incumprimento da estabilidade orzamentaria e da regra de gasto, daquela vinculada ao tema das facturas de Aquaguest dos anos 2014 e 2015, plan que se rematou este ano e que, como sinala intervención, se cumpriu.

Explica o sr. Fernández que este terceiro plan é consecuencia dunha decisión adoptado polo Pleno da Corporación Municipal, unha aposta polo aforro enerxético diante da emerxencia climática, que foi renovar as instalación do alumado exterior a través do IDAE. Salia que aquela decisión da Corporación ten unhas consecuencias contables, e unha delas é necesariamente este plan económico financeiro. O sr. Fernández sinala que teñen clara a súa parte de responsabilidade nesa decisión, de apostar pola eficiencia enerxética, e por iso teñen claro que non se van a opoñer. Sinala que en todo caso, tamén en coherencia coa postura manifestada nos orzamentos do 2017, prorrogado do 2018, polo problema do IDAE, e sendo consecuente co que acaba de subliñar, vanse a abster, aínda sabendo que é responsabilidade de todos/as os membros da Corporación que se vexan avogados a este plan económico financeiro.

Intervén a portavoz do PSdeG-PSOE, sra. Lemus, quen sinala que o risco do IDAE era coñecido, se fixeron varias reunións coa Xunta de Galicia e coa Intervención económica

para saber como podían axustar, en canto a magnitudes orzamentarias, o préstamo do IDAE, e axustouse algo pero non se dou axustado todo o que se tiña que axustar. Sinala a sra. Lemus que o tema chama a atención, debéndose adiantar que tamén vai a pasar con fondos FEDER, de case tres millóns de euros, nos que o 80 % da subvención o cubre o FEDER e isto se xustifica a efectos de gasto da subvención, porén os fondos propios, 600.000 €, non, polo que haberá que intentaran axustarse outra vez, aínda que entende que neste caso vai a ser máis fácil. Sinala a sra. Lemus que é curioso que se favoreza todo o posible mecanismos de cambio de adaptación dos Concellos ás novas circunstancias de cambio climático, eficiencia enerxética, sobre todo con fondos europeos, e chegado un determinado momento se atopan con estes problemas, engadindo que non hai formula legal para sostelo. Explica a sra. Lemus que se se fixeran as contas respecto á estabilidade orzamentaria, se non existira o préstamo do IDAE, habería unha capacidade de financiamento positiva de 1.400.000 €, e na regra de gasto habería un cumprimento da mesma, polo tanto parece que coas normas estatais estanse provocando incumprimentos aos Concellos cando debería ser todo o contrario, e nese senso deben buscarse mecanismos ao efecto.

Explica a sra. Lemus que a Unión Europea está dando aportacións de financiamento moi importantes, porén o que non pode ser é que acudir a estes fondos obrigue a todos a facer cálculos, non tanto da capacidade financeira, senón de cómo xustificar nun papel que non se están incumprindo os tres elementos básicos orzamentarios ou de liquidación que implica dende fai uns anos a normativa estatal. Sinala a sra. Lemus que ela sempre se queda co aforro acadado, e explica que feitas as primeiras contas existe xa un aforro do 50% e agora se están cambiando as peaxes. Sinala que se está discutindo con Naturgy, que funciona case como un monopolio, e despois de que se discuta e se leve a cabo a baixada das peaxes e dos cambios de contratos, se cambiará a contratación e se irá ao mecanismos de contratación do Estado, da FEMP, e se meteran na bolsa de contratación e a enerxía eléctrica sairá aínda máis barata que agora, que existen contratos antigos moi esaxerados.

Intervén o portavoz do PP, sr. Guerra, quen lle cede a palabra á concelleira do seu grupo D.<sup>a</sup> Lucia Calveo de la Uz.

A sra. Calvo sinala que efectivamente con este PEF se cumprirá a regra de gasto, o que celebran porque ao fin ao cabo a obriga que teñen é cumprir coa lei. A sra. Calvo formula dúas preguntas ao sr. alcalde. Pregúntalle se está en condicións de asegurar todos os pagos a provedores a 31 de decembro de 2019, e se se compromete a que a conta 413 estea a cero a 31 de decembro de 2019.

O sr. alcalde pregunta cal é a conta 413.

A sra. Calvo dille ao sr. alcalde que ten aí a interventora.

A sra. interventora sinala que agora mesmo non o lembra.

A sra. Calvo sinala que é onde van as facturas que non hai liquidez para pagar, que se quitan do seguinte orzamento.

O sr. alcalde sinala que hai dous conceptos distintos. Aclara que van a pagar todas as facturas a 31 de decembro, engadindo que non hai problemas de liquidez, senón que o problema, neste caso concreto, é que teñen que ter unha partida orzamentaria onde non acabaran de gastar todo, onde meter os gastos. Explica que se por exemplo teñen 100.000 € para gastar nunha partida, se fai un acordo de non dispoñibilidade de 50.000 €, e polo tanto non poden chegar facturas por máis de 50.000 €, e se iso acontecera, terían cartos para pagalas, pero non poderían pagalas porque se pasarían orzamentariamente. Salienta que non é un problema de que teñan ou non cartos, senón que se trata dun problema de política orzamentaria. Salienta o sr. alcalde que traballaron moito con Tesourería todo este plan para poder garantir iso, que sempre se pagaría, aínda que podería esixir un recoñecemento extraxudicial de crédito para pagalo, pero intentan ser serios e claro que van a poder garantir que se pagarán as facturas a 31 de decembro.

Non habendo máis intervencións e sometida a proposta a votación, prodúcese o seguinte resultado:

- Votos a favor – 7 (4 Son de Teo e 3 PSdeG-PSOE)
- Votos en contra – 7 (PP)
- Abstencións – 2 (BNG)

Producíndose un resultado de empate, sométese a proposta novamente a votación, obténdose o seguinte resultado:

- Votos a favor – 7 (4 Son de Teo e 3 PSdeG-PSOE)
- Votos en contra – 7 (PP)
- Abstencións – 2 (BNG)

Persistindo o resultado de empate, decide o voto de calidade do alcalde.

**De acordo co exposto, o Pleno da Corporación, con sete votos a favor (4 Son de Teo e 3 PSdeG-PSOE), sete en contra (7 PP) e dúas abstencións (2 BNG), decidindo o voto de calidade do Presidente, acorda:**

**Primeiro.- Aprobar o Plan Económico-Financeiro 2019-2020 que acompaña esta proposta e publicalo no Boletín Oficial da Provincia**

**Segundo.- Aprobar o acordo de non dispoñibilidade de créditos (AND) para o exercicio 2019 que esta proposta incorpora como ANEXO**

**Terceiro.- Remitir o PEF 2019-20, para o seu coñecemento á *Comisión Nacional de Administración Local* e a Dirección Xeral de Política Financeira e do Tesouro da Consellería de Facenda**

**Cuarto.- Efectuar as comunicacións telemáticas que procedan en cumprimento das obrigas contempladas na Orde HAP/2015/2012 de 1 de outubro, pola que se desenvolven as obrigas de subministro de información previstas na Lei Orgánica 2/2012 de 27 de abril de Estabilidade Orzamentaria e Sostibilidade Financeira (LOEPSF).**

**4.- DITAME DA PROPOSTA DA ALCALDÍA DE APROBACIÓN INICIAL DA MODIFICACIÓN DA ORDENANZA REGULADORA DO PREZO PÚBLICO POLA REALIZACIÓN DE ACTIVIDADES CULTURAIS E DEPORTIVAS.**

O sr. alcalde cede a palabra ao concelleiro dos servizos de benestar, persoal e deportes, D. Xosé Ignacio Iglesias Villar.

O sr. Iglesias da conta da proposta da alcaldía do 13 de setembro de 2019, que se recolle a continuación, ditaminada favorablemente pola Comisión Informativa de Facenda e Asuntos Económicos, que asume as funcións da Comisión Especial de Contas, de 19 de setembro de 2019.

### **“PROPOSTA DA ALCALDÍA**

#### **MODIFICACION DA ORDENANZA REGULADORA DO PREZO PÚBLICO POR ACTIVIDADES CULTURAIS E DEPORTIVAS.**

Considerando que o Concello de Teo ven prestando o servizo de actividades culturais e deportivas dende fai anos, e que conta cunha ordenanza reguladora da do prezo público por prestación dos citados servizos.

Considerando que resulta necesario incluír novas bonificacións para equiparara a situación das familias monoparentais coas numerosas, que deberían de aparecer reflexados no texto da ordenanza do prezo público.

**PROPOÑO** ao Pleno da Corporación, previo dictame da Comisión Especial de Contas, Facenda e Asuntos Económicos, a adopción do seguinte ACORDO:

**Primeiro**.-Aprobar inicialmente a modificación da Ordenanza do Prezo Público por actividades culturais e deportivas, que de seguido se reflicte:

#### **MODIFICACION DA ORDENANZA REGULADORA DO PREZO PÚBLICO POLA REALIZACIÓN DE ACTIVIDADES CULTURAIS E DEPORTIVAS.**

Artigo único.- modificación do artigo 5.-Exencións e bonificacións

Modifícase o texto do artigo 5º no apartado dedicado ás bonificacións, de xeito que queda redactado como segue:

Artigo 5 – Exencións e bonificacións

A solicitude de exencións de prezos públicos deberá facerse por escrito no momento de formalizar a inscrición na actividade, agás cambios que se produzan con posterioridade.

No caso de solicitudes posteriores de exencións de prezos públicos que sexan admitidas e tramitadas polo concello e de resolverse favorablemente, a bonificación ou exención terá efectos a partir da data da solicitude de bonificación.

Darán dereito a exención total nos prezos públicos pertencer a:

- Familias en situación de emerxencia social acreditada polos servizos sociais do Concello de Teo, mediante informe social, no que se faga constar a dificultade económica de acceso a este servizo.
- Unidades familiares cunha renda per cápita igual ou inferior ao 25% do IPREM anual\*. (\*) IPREM anual: indicador público de renda de efectos múltiples. Terase en

conta o IPREM anual do exercicio ao que corresponda a declaración do IRPF, e xustificarse coa presentación desta declaración ou documentación análoga no caso de non existir obriga legal de presentala.

- Unidades familiares na que todas e todos os seus membros adultos se atopen en situación de desemprego . xustificarse coa presentación de documentación acreditativa da situación de desemprego e da de convivencia.

Darán dereito a unha bonificación do 50% nos prezos públicos pertencer a:

- Familia numerosa de categoría especial, segundo a súa definición contemplada na Lei 40/2003, do 18 de novembro, de protección ás familias numerosas. Presentarase título de familia numerosa.
- Unidades familiares cunha renda per cápita igual ou inferior ao 50% do IPREM anual. (\*) IPREM anual: indicador público de renda de efectos múltiples. Terase en conta o IPREM anual do exercicio ao que corresponda a declaración do IRPF, e xustificarse coa presentación desta declaración ou documentación análoga no caso de non existir obriga legal de presentala.

Darán dereito a unha bonificación do 20% nos prezos públicos as seguintes situacións :

- Pertencer a unha familia numerosa categoría xeral, segundo a súa definición contemplada na Lei 40/2003, do 18 de novembro, de protección ás familias numerosas. Presentarase título de familia numerosa
- Usuarios e usuarias menores de idade con cunha discapacidade recoñecida como mínimo do 33% . Documentarase coa certificación de discapacidade ou co declaración de dependencia.
- Pertencer a familias monoparentais segundo a definición da Lei 3/2011, do 30 de xuño, de apoio á familia e á convivencia de Galicia, establecida no apartado c) do artigo 4. Esta situación deberá acreditarse mediante a presentación do Libro de familia no que figuren un/ha proxenitor/a e os/as menores, así como o certificado de convivencia. No caso de falecemento dun/ha proxenitor/a, presentarase, ademais da documentación anterior, o certificado de defunción. De existires outro proxenitor ou proxenitora coa obriga do pagamento da pensión de alimentos que non contribúa economicamente ao sustento da descendencia común, requiriranse tamén o testemuño do convenio xudicialmente aprobado ou da resolución xudicial que declare o dereito de alimentos, o testemuño de ter instado a execución da



resolución que declare aquel dereito e a certificación expedida polo/a secretario/a xudicial que acredite o resultado infrutuoso desa execución. Con carácter excepcional, por estar en curso o proceso xudicial correspondente, poderase eximir da entrega desta última documentación mediante informe do departamento de Servizos Sociais do concello de Teo.

As anteriores bonificacións non son acumulables, de xeito que os usuarios/as tan só poderán acollerse a aquela que lles resulta máis beneficiosa.

---

**Segundo.**- Expoñer o texto da Ordenanza ao público, durante trinta días mediante edicto no BOP, para que os interesados poidan presentar reclamacións ou suxestións.

Se transcorrido dito prazo, non se presentase reclamación algunha, a Ordenanza quedará definitivamente aprobada.

No suposto de que se presentase algunha reclamación ou suxestión, éstas deberán ser resoltas polo Pleno da Corporación previa aprobación definitiva”.

Obra no expediente informe de secretaría do 1 de outubro de 2019.

Explica o sr. Iglesias que a proposta refírese á modificación da última das ordenanzas reguladoras de prezo público de actividades que quedaban sen cambiar, xa que na anterior lexislatura cambiáronse as de conciliación e a de Teo madruga para introducir un elemento que era unha reclamación lóxica e de xustiza, a de igualar as bonificacións por mor de pertencer a unha familia numerosa e por pertencer a unha familia monoparental, que é o que basicamente se fai, ademais dalgunha pequena modificación de redacción para darlle coherencia ao artigo.

Preguntado polo sr. alcalde, os/as concelleiros/as non fan uso das súas quendas de intervención.

**Non abríndose debate e sometido o asunto a votación, o Pleno da Corporación, por unanimidade dos presentes (4 Son de Teo, 3 PSdeG-PSOE, 7 PP e 2 BNG), acorda:**

**Primeiro**.-Aprobar inicialmente a modificación da Ordenanza do Prezo Público por actividades culturais e deportivas, que de seguido se reflicte:

**MODIFICACION DA ORDENANZA REGULADORA DO PREZO PÚBLICO POLA REALIZACIÓN DE ACTIVIDADES CULTURAI E DEPORTIVAS.**

**Artigo único.- modificación do artigo 5.-Exencións e bonificacións**

**Modifícase o texto do artigo 5º no apartado dedicado ás bonificacións, de xeito que queda redactado como segue:**

**Artigo 5 – Exencións e bonificacións**

**A solicitude de exencións de prezos públicos deberá facerse por escrito no momento de formalizar a inscrición na actividade, agás cambios que se produzan con posterioridade.**

**No caso de solicitudes posteriores de exencións de prezos públicos que sexan admitidas e tramitadas polo concello e de resolverse favorablemente, a bonificación ou exención terá efectos a partir da data da solicitude de bonificación.**

**Darán dereito a exención total nos prezos públicos pertencer a:**

- **Familias en situación de emerxencia social acreditada polos servizos sociais do Concello de Teo, mediante informe social, no que se faga constar a dificultade económica de acceso a este servizo.**
- **Unidades familiares cunha renda per cápita igual ou inferior ao 25% do IPREM anual\*. (\*) IPREM anual: indicador público de renda de efectos múltiples. Terase en conta o IPREM anual do exercicio ao que corresponda a declaración do IRPF, e xustificarse coa presentación desta declaración ou documentación análoga no caso de non existir obriga legal de presentala.**
- **Unidades familiares na que todas e todos os seus membros adultos se atopen en situación de desemprego . xustificarse coa presentación de documentación acreditativa da situación de desemprego e da de convivencia.**

**Darán dereito a unha bonificación do 50% nos prezos públicos pertencer a:**

- **Familia numerosa de categoría especial, segundo a súa definición contemplada na Lei 40/2003, do 18 de novembro, de protección ás familias numerosas. Presentarase título de familia numerosa.**
- **Unidades familiares cunha renda per cápita igual ou inferior ao 50% do IPREM anual. (\*) IPREM anual: indicador público de renda de efectos múltiples. Terase en conta o IPREM anual do exercicio ao que corresponda a declaración do IRPF, e xustificarse coa presentación desta declaración ou documentación análoga no caso de non existir obriga legal de presentala.**

**Darán dereito a unha bonificación do 20% nos prezos públicos as seguintes situacións :**

- **Pertencer a unha familia numerosa categoría xeral, segundo a súa definición contemplada na Lei 40/2003, do 18 de novembro, de protección ás familias numerosas. Presentarase título de familia numerosa**
- **Usuarios e usuarias menores de idade con cunha discapacidade recoñecida como mínimo do 33% . Documentarase coa certificación de discapacidade ou co declaración de dependencia.**
- **Pertencer a familias monoparentais segundo a definición da Lei 3/2011, do 30 de xuño, de apoio á familia e á convivencia de Galicia, establecida no apartado c) do artigo 4. Esta situación deberá acreditarse mediante a presentación do Libro de familia no que figuren un/ha proxenitor/a e os/as menores, así como o certificado de convivencia. No caso de falecemento dun/ha proxenitor/a, presentarase, ademais da documentación anterior, o certificado de defunción. De existires outro proxenitor ou proxenitora coa obriga do pagamento da pensión de alimentos que non contribúa economicamente ao sustento da descendencia común, requiriranse tamén o testemuño do convenio xudicialmente aprobado ou da resolución xudicial que declare o dereito de alimentos, o testemuño de ter instado a execución da resolución que declare aquel dereito e a certificación expedida polo/a secretario/a xudicial que acredite o resultado infrutuoso desa execución. Con carácter excepcional, por estar en curso o proceso xudicial correspondente, poderase eximir da entrega desta última documentación mediante informe do departamento de Servizos Sociais do concello de Teo.**

**As anteriores bonificacións non son acumulables, de xeito que os usuarios/as tan só poderán acollerse a aquela que lles resulta máis beneficiosa.**

---

**Segundo.- Expoñer o texto da Ordenanza ao público, durante trinta días mediante edicto no BOP, para que os interesados poidan presentar reclamacións ou suxestións.**

**Se transcorrido dito prazo, non se presentase reclamación algunha, a Ordenanza quedará definitivamente aprobada.**

**No suposto de que se presentase algunha reclamación ou suxestión, éstas deberán ser resoltas polo Pleno da Corporación previa aprobación definitiva.**

## **5.- DITAME DA PROPOSTA DA ALCALDÍA DE MODIFICACIÓN DO REGULAMENTO DE ORGANIZACIÓN E FUNCIONAMENTO DAS ESCOLAS INFANTÍS MUNICIPAIS DO CONCELLO DE TEO.**

O sr. alcalde cede a palabra ao concelleiro dos servizos de benestar, persoal e deportes, D. Xosé Ignacio Iglesias Villar.

O sr. Iglesias da conta da proposta da alcaldía do 30 de setembro de 2019, que se recolle a continuación, ditaminada favorablemente pola Comisión Informativa de benestar social, igualdade, transportes, turismo, comercio e emprego de 19 de setembro de 2019.

### **“PROPOSTA DA ALCALDÍA**

### **MODIFICACIÓN DO REGULAMENTO DE ORGANIZACIÓN E FUNCIONAMENTO DAS ESCOLAS INFANTÍS MUNICIPAIS DO CONCELLO DE TEO**

O Regulamento de organización e funcionamento das Escolas Infantís municipais do concello de Teo (en adiante EIMs) foi publicado no BOP do 7 de decembro de 2015.

Este regulamento establece unha prelación no acceso ás prazas das Escolas Infantís Municipais e a estes efectos hai que ter en conta que as necesidades sociais mudan e

faise necesario contemplar unha nova categoría no listado de colectivos con prioridade de acceso, modificando o artigo 6 b), que actualmente ten o seguinte contido:

“ b) *Novo ingreso:*

*As prazas que non sexan cubertas no procedemento anterior ofertaranse á poboación xeral que cumpra os requisitos que fixa o artigo 4º. Dentro desta modalidade determínase a seguinte orde de preferencia:*

- 1. Usuarías/os que ocupaban praza reservada a ingresos urxentes.*
- 2. Fillas/os de traballadoras/os do centro no que estas/es prestan servizo, independentemente do seu empadramento no concello de Teo.*
- 3. Solicitantes con irmán/á cunha praza renovada no centro para o que se solicita o novo ingreso.*
- 4. As restantes solicitudes de unidades familiares nas que todos os seus membros estean empadroados, adxudicadas atendendo á puntuación obtida pola aplicación do baremo que se achega no Anexo I.*
- 5. As solicitudes de unidades familiares nas que non todos os seus membros estean empadroados, adxudicadas atendendo á puntuación obtida pola aplicación do baremo que se achega no Anexo I.*

*Poderanse presentar solicitudes antes do nacemento, estas faranse efectivas se a data de nacemento fora anterior ao día 1 de xuño do ano para o que se solicita praza.*

*Neste caso deberá acreditarse no menor tempo posible o seu nacemento presentando no rexistro do concello o libro de familia no que se realice a súa inscrición. No caso de que se producise con posterioridade a esta data, a solicitude non terá ningún efecto, sendo levada de xeito automático na seguinte convocatoria da comisión de baremación de rocedemento extraordinario.”*

Aos efectos do previsto no artigo 133 da Lei 39/2015, do 1 de outubro, do procedemento administrativo común das Administracións Públicas (LPAC), hai que ter en conta que o vixente Regulamento de organización e funcionamento das escolas infantís municipais do concello de Teo foi aprobado no ano 2015, resultando polo tanto preciso de acordo co exposto a súa revisión e actualización, podéndose entender que a modificación do Regulamento, que agora se propón regula aspectos parciais desta materia previamente regulada.

Considerando que o Regulamento en cuestión non vai ter un impacto significativo na actividade económica nin impón obrigas relevantes aos destinatarios e destinatarias, tratándose, como se desprende do seu contido, dunha norma organizativa dun servizo municipal.

En virtude do exposto, e de conformidade co previsto no artigo 133 e Disposición adicional primeira da Lei 39/2015, do 1 de outubro, do procedemento administrativo común das Administracións Públicas, e artigo 49 da Lei 7/1985, do 2 de abril, reguladora das bases do réxime local, propónse ao Pleno da Corporación a adopción do seguinte acordo:

**Primeiro.**- Aprobar inicialmente a modificación do Regulamento de organización e funcionamento das escolas infantís municipais do concello de Teo, nos termos que se recolle a continuación.

Modifícase o texto do apartado b do artigo 6º no procedemento ordinario de acceso, incorporando dentro do mesmo unha nova categoría no listado de colectivos con prioridade de acceso, no punto 2 (“2. Fillas/os de traballadoras/os do centro no que estas/es prestan servizo, independentemente do seu empadramento concello de Teo”), quedando o apartado b) do artigo en cuestión (6ºb) redactado segundo se detalla a continuación:

“ b) Novo ingreso:

As prazas que non sexan cubertas no procedemento anterior ofertaranse á poboación xeral que cumpra os requisitos que fixa o artigo 4º. Dentro desta modalidade determínase a seguinte orde de preferencia:

- 1- Usuarías/os que ocupaban praza reservada a ingresos urxentes.
- 2- Nenas e nenos que teñan necesidades educativas especiais que dean lugar a necesidade de ocupar dúas prazas.
- 3- Fillas/os de traballadoras/os do centro no que estas/es prestan servizo, independentemente do seu empadramento no concello de Teo.

- 4- Solicitantes con irmán/á cunha praza renovada no centro para o que se solicita o novo ingreso.
- 5- As restantes solicitudes de unidades familiares nas que todos os seus membros estean empadroados, adxudicadas atendendo á puntuación obtida pola aplicación do baremo que se achega no Anexo I.
- 6- As solicitudes de unidades familiares nas que non todos os seus membros estean empadroados, adxudicadas atendendo á puntuación obtida pola aplicación do baremo que se achega no Anexo I.

Poderanse presentar solicitudes antes do nacemento, estas faranse efectivas se a data de nacemento fora anterior ao día 1 de xuño do ano para o que se solicita praza.

Neste caso deberá acreditarse no menor tempo posible o seu nacemento presentando no rexistro do concello o libro de familia no que se realice a súa inscrición. No caso de que se producise con posterioridade a esta data, a solicitude non terá ningún efecto, sendo levada de xeito automático na seguinte convocatoria da comisión de baremación de procedemento extraordinario”.

**Segundo.-** Someter o expediente a información pública, mediante anuncio no Boletín Oficial da Provincia, no taboleiro de edictos da Corporación e na web municipal, durante o prazo de 30 días, para a presentación de reclamacións. De non formularse reclamacións durante a exposición pública, entenderase aprobada definitivamente a citada modificación.

**Terceiro.-** O acordo definitivo, incluído o inicial elevado automaticamente a tal categoría, e o texto íntegro da modificación deberá publicarse no Boletín Oficial da Provincia, sen que entre en vigor ata que se leve a cabo dita publicación e transcorra o prazo previsto no art. 65.2 da Lei 7/1985, de 2 de abril, de conformidade cos artigos 49 e 70.2 da citada lei”.

O sr. Iglesias sinala que esta modificación xa a tiñan prevista dende o anterior proceso de matrículas da escolas infantís. Explica que a cuestión é que ata este momento para o novo ingreso o feito de ter unha discapacidade so se tiña en conta con dous puntos dentro do baremo xeral, dando igual que estes dous puntos foran porque calquera membro da unidade familiar tivera unha discapacidade ou a tivera o propio demandante da praza. A cuestión é que os/as nenos/as que teñan necesidades educativas especiais e necesiten ocupar dúas prazas, tal e como se regula na normativa autonómica, nas escolas infantís

privadas ou ben lles cobraban dúas prazas ou directamente non lles contestaban, e iso daba lugar a que de facto a única alternativa que tiñan era a escola pública. Explica o sr. Iglesias que isto obriga a cambiar os puntos onde se recollen as prioridades dos novos ingresos da escolas infantís, e introducilos no punto dous, e así so terán por diante os/as usuarios que ocupaban praza reservada a ingresos urxentes do ano anterior e así o que se consagra é practicamente a seguridade de praza para este tipo de alumnos/as.

Aberta a primeira quenda de intervencións, o portavoz do BNG, amosa a súa conformidade á proposta, engadindo que en todo caso, aínda que está regulado o de ocupar dúas prazas, o realmente importante sería ocupar unha praza e ter persoal de apoio.

A portavoz do PSdeG-PSOE, sra. Lemus, e o portavoz do PP, sr. Guerra, non fan uso das súas quendas de intervención.

**Rematado o debate e sometido o asunto a votación, o Pleno da Corporación, por unanimidade dos presentes (4 Son de Teo, 3 PSdeG-PSOE, 7 PP e 2 BNG), acorda:**

**Primeiro.- Aprobar inicialmente a modificación do Regulamento de organización e funcionamento das escolas infantís municipais do concello de Teo, nos termos que se recolle a continuación.**

**Modifícase o texto do apartado b do artigo 6º no procedemento ordinario de acceso, incorporando dentro do mesmo unha nova categoría no listado de colectivos con prioridade de acceso, no punto 2 (“2. Fillas/os de traballadoras/os do centro no que estas/es prestan servizo, independentemente do seu empadramento concello de Teo”), quedando o apartado b) do artigo en cuestión (6ºb) redactado segundo se detalla a continuación:**

**“ b) Novo ingreso:**

**As prazas que non sexan cubertas no procedemento anterior ofertaranse á poboación xeral que cumpra os requisitos que fixa o artigo 4º. Dentro desta modalidade determínase a seguinte orde de preferencia:**



- 1- **Usuarias/os que ocupaban praza reservada a ingresos urxentes.**
- 2- **Nenas e nenos que teñan necesidades educativas especiais que dean lugar a necesidade de ocupar dúas prazas.**
- 3- **Fillas/os de traballadoras/os do centro no que estas/es prestan servizo, independentemente do seu empadramento no concello de Teo.**
- 4- **Solicitantes con irmán/á cunha praza renovada no centro para o que se solicita o novo ingreso.**
- 5- **As restantes solicitudes de unidades familiares nas que todos os seus membros estean empadroados, adxudicadas atendendo á puntuación obtida pola aplicación do baremo que se achega no Anexo I.**
- 6- **As solicitudes de unidades familiares nas que non todos os seus membros estean empadroados, adxudicadas atendendo á puntuación obtida pola aplicación do baremo que se achega no Anexo I.**

**Poderanse presentar solicitudes antes do nacemento, estas faranse efectivas se a data de nacemento fora anterior ao día 1 de xuño do ano para o que se solicita praza.**

**Neste caso deberá acreditarse no menor tempo posible o seu nacemento presentando no rexistro do concello o libro de familia no que se realice a súa inscrición. No caso de que se producise con posterioridade a esta data, a solicitude non terá ningún efecto, sendo levada de xeito automático na seguinte convocatoria da comisión de baremación de procedemento extraordinario”.**

**Segundo.- Someter o expediente a información pública, mediante anuncio no Boletín Oficial da Provincia, no taboleiro de edictos da Corporación e na web municipal, durante o prazo de 30 días, para a presentación de reclamacións. De non formularse reclamacións durante a exposición pública, entenderase aprobada definitivamente a citada modificación.**

**Terceiro.- O acordo definitivo, incluído o inicial elevado automaticamente a tal categoría, e o texto íntegro da modificación deberá publicarse no Boletín Oficial da**

**Provincia, sen que entre en vigor ata que se leve a cabo dita publicación e transcorra o prazo previsto no art. 65.2 da Lei 7/1985, de 2 de abril, de conformidade cos artigos 49 e 70.2 da citada lei.**

E non habendo máis asuntos que tratar, sendo as vinte horas e cincuenta minutos, de orde da Presidencia, levántase a sesión, da que se estende a presente acta, do que eu, secretaria, dou fe.

O alcalde

A secretaria

Rafael C. Sisto Edreira

Virginia Fraga Díaz

## **ANEXO**

**“PLAN ECONÓMICO – FINANCIERO DEL CONCELLO DE TEO 2019/2020**

**AOS EFECTOS DO CUMPRIMENTO DA**

**REGRA DE GASTO E A ESTABILIDADE ORZAMENTARIA**

### **INDICE**

1. Introducción
2. Contido e tramitación
3. Situación actual
4. Causas do incumprimento da Regra de Gasto
5. Causas del incumprimento da Estabilidade orzamentaria

6. Medidas a adoptar para corrixir a situación

7. Conclusión

## 1. INTRODUCCIÓN

“A Regra de Gasto é un instrumento de disciplina orzamentaria que trata de garantir a sostibilidade das contas públicas de xeito que, nun horizonte de medio prazo, o medre do gasto das AAPP veña limitado pola capacidade de financialo con ingresos estables e sostidos no tempo.” Así define a Autoridade Independente de Responsabilidade Fiscal (AIReF) creada pola Lei Orgánica 6/2013 de 14 de novembro, a Regra de Gasto nun documento divulgativo da mesma. E engade: “De acordo con esta filosofía, a aplicación desta regra impide que o gasto público medre anualmente por enriba da taxa de referencia de medre do PIB a medio prazo da economía española, sendo posible superala, unicamente, no suposto de que ese exceso se compense con aumentos de ingresos de carácter permanente.”

A Regra de Gasto despreza a súa operatividade unha vez que as AAPP, tralo intenso proceso de consolidación fiscal, se aproximan ao equilibrio orzamentario, ao impoñer á súa aplicación unha evolución do gasto público máis restritiva que a que resultaría compatible co cumprimento do obxectivo de déficit.

Por outra banda, trátase dunha Regra esixible a todas as Entidades Locais, con independencia da súa situación económica, financeira e orzamentaria. Así tamén estará sometida a dita regra unha entidade local saneada, sen débeda pública, con superávit orzamentario e con remanente de tesourería positivo. É unha regra de carácter absoluto que non admite excepcións no seu cumprimento.

O informe de Intervención sobre la liquidación do exercicio 2018 de 27 de maio de 2019 constata o incumprimento da estabilidade orzamentaria e da regra de gasto, o que esixe pois, de conformidade co disposto nos artigos. 21 e 23 da LOEPSF, a formulación dun Plan Económico Financeiro que permita no ano en curso e no seguinte cumprir cos referido parámetros.

Estes datos da liquidación orzamentaria do exercicio 2018 foron remitidos ao *Ministerio de Hacienda* ao abeiro do artigo 15.4 da Orde HAP 2105/2012, de 1 de outubro, pola que se

desenvolven as obrigas de subministración de información previstas na Lei orgánica 2/2012, do 27 de abril, de estabilidade orzamentaria e sustentabilidade financeira (LOEOSF).

Consecuentemente, con data do 3 de xullo de 2018 a Dirección Xeral de Política Financeira e do Tesouro e Fondos Europeos da Consellería de Facenda da Xunta de Galicia, remitiu escrito a esta Alcaldía extraendo das regras fiscais o resultado dun incumprimento da regra de gasto de 572.670,19€ e unha capacidade de financiamento de 870.145,43€, do que se conclúe a necesidade dun acordo de non dispoñibilidade de créditos (AND) por 588.132,90€ e da aprobación dun novo PEF 2019-2020.

## **2. CONTIDO E TRAMITACIÓN**

De acordo co artigo 21 da LOEPSF, o Plan Económico-Financeiro conterá, como mínimo, a seguinte información:

- a) As causas do incumprimento da regra de gasto.
- b) As previsións tendenciais de ingresos e gastos, baixo o suposto de que non se producen cambios nas políticas fiscais e de gastos.
- c) A descrición, cuantificación e o calendario de aplicación das medidas incluídas no plan, sinalando as partidas orzamentarias ou rexistros extraorzamentarios nos que se contabilizarán.
- d) As previsións das variables económicas e orzamentarias das que parte o plan, así como os supostos sobre os que se basean estas previsións, de acordo co previsto no informe ao que se fai referencia no apartado 5 do artigo 15.
- e) Unha análise de sensibilidade considerando escenarios económicos alternativos.

Ademais, o referido Plan debe conter tamén a información a que se refire o art. 9.2 da Orden HAP/2015/2012 de 1 de outubro, pola que se desenvolven as obrigas de subministro da información. Remítirase para o seu coñecemento á *Comisión Nacional de Administración Local*, e daráselle a mesma publicidade que a establecida polas leis para os orzamentos da entidade.

Finalmente, o *Ministerio de Hacienda y Administraciones Públicas* dará publicidade aos plans económico-financeiros e á adopción efectiva das medidas aprobadas cun seguimento do impacto efectivamente observado das mesmas.

### 3. SITUACIÓN ACTUAL

3.1 A liquidación do orzamento municipal 2018 ofrece as seguintes magnitudes:

REMANENTE DE TESOURERÍA PARA GASTOS XERAIS :	2.343.771,17 €
RESULTADO ORZAMENTARIO AXUSTADO:	808.855,98 €

3.2 En canto á análise da **ESTABILIDADE ORZAMENTARIA**, o informe de Intervención de data 27 de maio de 2019 sinala os seguintes datos:

Capítulo	DRN liq. 2018	ORN liq. 2018
<b>1</b>	4.761.025,86	3.805.316,51
<b>2</b>	99.254,53	5.198.468,64
<b>3</b>	2.253.005,40	4.187,91
<b>4</b>	5.119.603,26	559.480,59
<b>5</b>	0,00	0,00
<b>6</b>	0,00	4.164.341,32
<b>7</b>	591.916,49	0,00
<b>Total</b>	<b>12.824.805,54</b>	<b>13.731.794,97</b>
<b>Diferenza: capacidade de financiamento</b>		<b>-906.989,43</b>

<b>Axustes</b>	36.844,69
<b>EP Final</b>	<b>-870.144,74</b>

Como ben sinala o informe de Intervención, a estabilidade orzamentaria ven determinada pola diferenza entre os capítulos 1 ao 7 do estado de Ingresos e os capítulos 1 ao 7 do estado de Gastos, non contabilizándose neste cálculo os ingresos do capítulo 9 derivados

do financiamento, neste caso, con fondos europeos para a execución de grandes investimentos rendibles a medio prazo.

Deste modo, INCÚMPRESE o principio de estabilidade orzamentaria de acordo coa definición contemplada no Sistema Europeo de Contas Nacionais e Rexionais.

**3.3** En canto ao principio de **SOSTIBILIDADE FINANCEIRA**, e de acordo co artigo 4 da LOEPSF, utilízanse como indicadores do cumprimento deste principio:

AFORRO NETO (A 31/12/2018)	:	2.002.928,09 €
TANTO POR CENTO DE ENDEBEDAMENTO (a 31/12/2016)		42,20 %

O Aforro Neto positivo indícanos que os ingresos correntes do Concello son suficientes para facer fronte aos gastos correntes e ás amortizacións de capital dos préstamos concertados.

E, por outra banda, o concello de Teo atópase moi por baixo do coeficiente do 75% da Ratio Legal de Endebemento, que privaría da posibilidade de apelar ao crédito para financiar operacións de capital.

De acordo coo anterior, CUMPRE co principio de Sostibilidade Financeira.

**3.4** Finalmente, respecto á análise da **REGRA DE GASTO**, a liquidación do orzamento de 2018 pon de manifesto o seu incumprimento, de acordo cos seguintes cálculos:

Ano 2018

Límite regra de gasto 2018 no PEF vixente	Aumento/ diminución recadación cambios normativos	Límite regra de gasto para o exercicio	GC liquidación 2018	Cumprimento Regra de gasto
11.709.461,75	0,00	11.709.461,75	12.282.132,54	<b>-572.670,79</b>

No ano 2019 débense pois adoptar os acordos de non dispoñibilidade de créditos (AND) previstos no artigo 25 da LOEOSF, como mínimo, a contía do incumprimento da regra de

gasto incrementada na taxa de referencia do incremento do produto interior bruto aplicable ao exercicio 2019 (2,7%), é dicir, un importe de **588.132,90€**.

#### **4. CAUSAS DO INCUMPRIMENTO DA REGRA DE GASTO**

A orixe deste desaxuste está na participación do concello de Teo no programa de axudas para a renovación das instalacións de alumeado exterior municipal convocadas polo IDAE (Ministerio de Energía, Turismo y Agenda digital. Resolución do 28 de abril publicada no BOE do 5 de maio de 2015), aprobada polo Pleno da Corporación o 28 de abril de 2016 sen ningún voto en contra.

Este acordo fundamentábase na necesidade de renovar completamente unha instalación de alumeado público absolutamente obsoleta, de alto consumo enerxético e altamente custosa para o concello, utilizando un préstamo reembolsable por 2.716.886,86€ a interese do 0.0% concedido polo instituto para a Diversificación e Aforro da Enerxía (IDAE).

A Auditoría enerxética na que se basea o proxecto de renovación financiado polo IDAE indica que a súa execución vai supoñer un aforro anual en consumo de 283.728,57€, sen contabilizar nin o aforro por redución de potencia contratada nin o aforro estimado polo incremento nas tarifas eléctricas nos próximos anos, polo que a redución de custos anuais vai permitir a devolución da cota anual de capital (ao interese do 0%) e un importante aforro anual a maiores.

A execución do contrato asinado coa empresa *Asistencia y Soluciones de Arquitectura e Ingeniería SL* (ASAI) por un importe total de 2.671.536,06€ (IVE incluído) como resultado do procedemento público aberto para a execución do “Proxecto de obras de renovación das instalacións de alumeado público exterior do Concello de Teo”, deu lugar a aprobación das dez certificacións de obra e das correspondentes facturas polo importe total do contrato, a última delas en marzo de 2019.

A contabilización das facturas do proxecto recoñecidas e pagadas ao longo do exercicio 2018 supuxeron un importe total de 2.182.819,59€, un gasto extraordinario, exclusivo neste exercicio, e que suporá un importante aforro nos próximos anos.

## 5. CAUSAS DO INCUMPRIMENTO DA ESTABILIDADE ORZAMENTARIA

A orixe deste desaxuste está, como xa se explica no apartado referido á regra de gasto, na participación do concello de Teo no programa de axudas para a renovación das instalacións de alumeadado exterior municipal convocadas polo IDAE (Ministerio de Energía, Turismo y Agenda digital, aprobada polo Pleno da Corporación o 28 de abril de 2016.

A resolución do Consello de Administración do Instituto para a Diversificación e Aforro da Enerxía (IDAE) do 20 de decembro de 2016 favorable á solicitude da axuda solicitada polo concello de Teo, complementada coa resolución do mesmo órgano asinada o 13 de febreiro de 2018, concedeu un préstamo reembolsable por 2.716.886,86€ a interese do 0.0%, que deu lugar á escritura pública de contrato de préstamo asinado en Madrid o 15 de marzo de 2018, e ao ingreso desta cantidade nas arcas municipais con data do 5 de abril de 2018.

A execución do contrato asinado coa empresa *Asistencia y Soluciones de Arquitectura e Ingeniería SL (ASAI)* por un importe total de 2.671.536,06€ (IVE incluído), deu lugar a aprobación das dez certificacións de obra e das correspondentes facturas polo importe total do contrato.

A contabilización das facturas do proxecto recoñecidas e pagadas ao longo do exercicio 2018 supuxeron un importe total de 2.182.819,59€, incorporadas no capítulo 6 de gastos non financeiros do exercicio. O ingreso do préstamo recibido compútase no capítulo 9 de ingresos, polo que non se contabiliza como “ingreso non financeiro”, orixinando o incumprimento da estabilidade orzamentaria en 870.144,74€.

Por outra banda, como xa se especificou con anterioridade, a Auditoría enerxética na que se basea o proxecto de renovación financiado polo IDAE indica que a súa execución vai supoñer un aforro anual en consumo de 283.728,57€, sen contabilizar nin o aforro por redución de potencia contratada nin o aforro estimado polo incremento nas tarifas eléctricas nos próximos anos, polo que a redución de custos anuais vai permitir a devolución da cota anual de capital e un importante aforro a maiores.

Por outra banda, tendo en conta os datos reflectidos no Informe de Intervención sobre a liquidación do exercicio do 2018 asinada o 27 de maio de 2019, que sinala un resultado orzamentario axustado de +808.855,98€, así como a evolución do Remanente líquido de Tesourería para Gastos Xerais (RLTGG) e o nivel de endebedamento nos últimos exercicios, a situación económico-financiera do Concello é estable e solvente.



## 6. MEDIDAS A ADOPTAR PARA CORRIXIR A SITUACIÓN

A nova versión do manual da aplicación PEFEL2 sobre o *Modelo de Plan Económico Financiero* desenvolvido en aplicación do artigo 21 da Lei Orgánica 2/2012, de 27 de abril, de Estabilidade Orzamentaria e Sostibilidade, establece que, a partir do exercicio no que se aprobe o Plan Económico Financeiro, tomarase como teito de gasto non o límite da entidade en base á taxa de referencia correspondente, senón o gasto real executado (por enriba dese límite) no exercicio do incumprimento. Deste xeito, a base de cálculo para os sucesivos exercicios de vixencia do Plan será o gasto computable incumplido ou excedido.

Aprobado, en cumprimento do artigo 25 da LOEOSF, o acordo de non dispoñibilidade de créditos (AND) por 588.132,90€, unha vez detectadas e analizadas as causas que motivaron o incumprimento, e tendo en conta a situación económico-financieira da Corporación a 31/12/2018, así como o orzamento de 2019, non se considera preciso establecer ningunha medida estrutural para corrixir este desequilibrio, pois a ausencia de incorporación de créditos ao orzamento de 2019 con cargo ao RTGX así como o carácter excepcional do gasto realizado que motivou o incumprimento da regra de gasto (o proxecto do IDAE), deben propiciar que en 2019 se cumpra coa Regra de Gasto e a estabilidade orzamentaria na liquidación deste.

Con todo, e a fin de garantir a consecución de tal obxectivo farase unha permanente avaliación e seguimento do desenvolvemento orzamentario, de forma que, ante a primeira sinal de existencia de risco, se adopten as medidas necesarias para asegurar o seu cumprimento, chegando en última instancia a declarar como crédito non dispoñible o importe preciso das partidas que se estime oportuno.

Cabe considerar, aínda que teña que tomarse coas debidas reservas, que o estado de execución do orzamento de 2019 a 30 de xuño de 2019, aporta os seguintes datos:

<b>Dereitos recoñecidos netos a 30/06/2019</b>	<b>Obrigas recoñecidas netas a 30/06/2019</b>
5.696.891,06	4.928.361,40

<b>Remanente de tesourería para gastos xerais a 30/06/2019</b>
--

2.184.432,07
--------------

Poderíase considerar así, que neste momento temos absorbido o exceso de gasto computable de 2018 que provoca o incumprimento da Regra de Gasto.

## 8. CONCLUSIÓN

Analizada a situación económica do concello de Teo derivada da liquidación do orzamento 2018, podemos afirmar que, en xeral, as magnitudes orzamentarias son claramente positivas.

De este modo, dispónse dun considerable Remanente de Tesourería para Gastos Xerais e dun Aforro Neto Positivo, a Ratio do Capital Vivo a 31/12/2018 atópase notablemente por baixo do límite que marca a normativa vixente e, ademais, cúmprese co principio de Sostibilidade financeira.

Polo que se refire ao incumprimento da Regra del Gasto e a Estabilidade Orzamentaria, o que motiva a elaboración e aprobación do presente plan económico–financeiro, e tal e como se detallou con anterioridade, é consecuencia directa da participación do concello de Teo no programa de axudas para a renovación das instalacións de alumeadado exterior municipal convocadas polo IDAE (Ministerio de Energía, Turismo y Agenda digital, aprobada polo Pleno da Corporación o 28 de abril de 2016, un gasto excepcional e que, ademais, vai supoñer un importante aforro nos próximos anos.

Consecuentemente, este plan económico–financeiro presenta como únicas medidas de corrección o acordo de non dispoñibilidade de créditos (AND) por 588.132,90€, o exhaustivo control da execución do orzamento de 2019 e o compromiso de aprobación dun orzamento municipal para o exercicio 2020 cumprindo cos principios de estabilidade orzamentaria e regra del gasto.

Teo, 20 de setembro 2019

Asdo.: Rafael C. Sisto Edreira

Alcalde”